

DISCOVERS

piece 127
a


DES DROICTS ET PRETENTIONS

DE MONSEIGNEVR

FRIDERIC-MAVRICE DE LA TOVR

Duc de Buillon, Prince souuerain de Sedan.

*Contre l'Euesque & Chapitre de l'Eglise de Liege,
& les Estats & Communantez dudit Pays.*



M. DC. XXXVI.

DISCOURS

DES DROITS ET PRIVILEGES

DE MONSIEUR

FRIDERIC-MARTIN DE LA TOUR

De la Bibliothèque de la Ville de Paris

Comme l'ouvrage est de la Bibliothèque de la Ville de Paris

et est de la Bibliothèque de la Ville de Paris

M. DC. XXVI.



IL est certain que le Duché de Buillon appartient aux Princes de Sedan, & qu'ils l'ont possédé, & iouï d'iceluy, par vn si long temps qu'il n'est point de memoire du contraire. Et si quelquesfois, à cause de la guerre, il a esté occupé sur eux, ils y ont esté reestablis par les mesmes voyes, ou par les traictez de paix qui se sont ensuiuis. Et encore qu'en la guerre que l'Empereur Charles V. fit à Robert II. du nom Prince de Sedan & Duc de Buillon, l'an 1521. le chasteau de Buillon fut pris sur luy, & brulé: & qu'en cét incendie les principaux titres concernans ce Duché furent perdus, ou plustost soustraits, à dessein d'en faire perdre les droicts, aussi bien que la possession; neantmoins, au défaut de ces preuues domestiques, il en reste assez de publiques pour les confirmer, ainsi qu'il se verra cy-apres.

On demeure d'accord que ce Duché a esté possédé par l'Eglise de Liege dès l'an 1098. en vertu de l'engagement que Godefroy de Bologne Duc de Buillon & de la basse Lorraine, s'en allant à la terre sainte, en fit à l'Euesque Obert, pour sept mil marcs d'argent, ainsi qu'il a esté remarqué par Oldericus Vitalis, autheur du siecle, en son histoire: *Tunc Godefridus Lotharingie Dux Bullonem castrum, cum omnibus appenditiis suis, episcopo Leodiensi inuadiant, & ab eo septem millia marcas argenti recepit.* Mais cét engagement n'estant pas vn titre pour acquérir la propriété de la chose engagée, ains seulement pour en iouïr par vsufruit, estant en la liberté des propriétaires, ou de ceux qui ont droit d'eux, de la retirer quand bon

Engagement
du Duché de
Buillon à l'E-
glise de Liege.
1098.

Older. vit. lib.
10. hist. Eccles.

*Pretention du
Comte de Bar
au Duché de
Buillon.*

1134.

*Prise du cha-
steau de Buil-
lon par le Cō-
te de Bar.*

*Jugement du
Pape & de
l'Empereur en
faueur du Cō-
te de Bar con-
tre l'Euesque
de Liege.*

*Chron. Alber.
an. 1142.*

*Nicol. can.
Leod. in triū-
pho S. Lāberti
cap. 3. 4. & 5.*

leur semble; nous apprenons par l'histoire des Euesques de Liege, qu'apres la mort de Godefroy de Buillon, & de Baudouin son frere, Roys de Ierusalem, Renaud I. du nom Comte de Bar l'an 1134. pretendit ce Duché luy appartenir par droict de succession, à cause de la Marquise Mathilde fille de Boniface Marquis de Lombardie, & de Beatrix fille aisnée de Frideric II. Duc de la haute Lorraine, laquelle estoit sœur de Sophie de Lorraine son ayeule, & fit offrir à l'Euesque Alexandre le remboursement du prix de cét engagement, lequel ayant refusé, il luy fit la guerre, & s'empara du chasteau de Buillon, dont l'Euesque Adalbero II. successeur d'Alexandre fit plainte au Pape Innocent II. & pour ce sujet fit trois voyages à Rome, afin de faire excommunier le Comte de Bar, comme deteneur des biens de l'Eglise, lequel y fut aussi pour defendre son droict: mais le Pape Innocent ayant pris cognoissance de l'affaire, & ouï les parties, prononça contre l'Euesque de Liege en faueur du Comte de Bar. Il se plaignit aussi à l'Empereur Conrad III. mais avec aussi peu de succez, l'un & l'autre ayans recogneu la iustice du Comte, & la mauuaise foy de l'Euesque de Liege, de vouloir retenir vne telle seigneurie, engagée à si vil prix, dont il n'auoit que l'usufruit, au prejudice de ceux ausquels en appartenoit la propriété, & auoient droict de la retirer: quoy qu'il semble que ceste faculté deuoit plustost appartenir aux Comtes de Bologne, qu'aux Comtes de Bar, comme plus proches du Duc Godefroy de Buillon, à sçauoir à Eustache Comte de Bologne son frere, & à ses descendants, desquels par femmes est issu Mr le Duc de Buillon qui est à present. Alberic en sa chronique faict mention de ce differend d'entre l'Euesque de Liege & le Comte de Bar, en ces termes: *Comes Barrensis Raynaldus ita Papam & Imperatorem ad suam partem attraxerat, ut omni genere humano, tam seculari quàm ecclesiastico, causa Leodiensis Ecclesie fuerit destituta.* Et Nicolas Chanoine de Liege autheur du siecle, & apres luy Gilles

d'Orual: Adeptus sedem pontificalem Adalbero, Regiam auctoritatem precabatur, omniumque potentiorum exorans clementiam, conquerebatur super Bullonij amissione: Romam quoque adiit, querelam suam in auribus beati Petri eiusque vicarij deposuit, petens ut ei iustitia non negaretur, & anathematis sententia in Raynaldum Comitem jacularetur, qui hoc pridem sibi cauerat, Romam adierat, & Apostolico narrauerat, hereditaria successione Mathildis Marchise, hanc sibi prouenire Marchiam, & ecclesie se velle reddere quam praeftiterat mille trecentarum marcarum pecuniam. Conciliatis ergo sibi potentioribus animis, hanc ab eis, ut dicitur, accepit sibi confirmatam attestationem, quod quandiu viueret, nunquam pro hac re ei intentaret excommunicationem. Quapropter episcopus secundo redijt inefficax, nec apud Regem iustitiam, nec apud vicarium beati Petri ullam consequutus misericordiam: & quia deerat ei Apostolica Regalisque Iustitia, armis Bullonium Castrum repetere statuit. Nonobstant le iugement du Pape & de l'Empereur donné en cognoissance de cause, Adalbero se resolut d'assiéger le Chasteau de Buillon, lequel, apres plusieurs actes d'hostilité, il prit miraculeusement l'an 1141. sur les enfans du Comte de Bar qui le defendoient, ainsi qu'escriuent les auteurs sus alleguez: & depuis, l'Eglise de Liege a ioüy de ce Duché, iusques enuiron l'an 1435. qu'il se trouue auoir esté possédé par d'autres Seigneurs. Car l'histoire nous apprend, que Jean de Los, Seigneur de Heinsbergues estoit lors Duc de Buillon, & en ceste qualité il est nommé entre les Princes & Seigneurs qui accompagnerent, ceste année là, à Arras, Philippes le bon Duc de Bourgogne, entre lesquels estoit aussi l'Euesque de Liege, fils dudit Duc de Buillon. Cela se voit és memoires d'Oliuier de la Marche, où il parle du traité de paix fait à Arras entre le Roy Charles VII. & Philippes I. Archiduc d'Autriche: A celle conuention & assemblée faite à Arras, de la part de Monsf. de Bourgogne, il y fut en personne, y estant accompagné du Duc Arnoul de Gelre, de l'Euesque de Liege, du DUC DE BUILLON, qui se nommoit de Heinsbergues, de Jean Monsieur heritier du Duc de Cleues, de Charles

Egid. Aurex
vallis, in vita
Adalber. II.
cap. 28. & 29.
tom. 2. gest.
episc. Leod.

Prise du chasteau de Buillon par l'Euesque de Liege sur le Comte de Bar.

1141.

Jean de Heinsbergues Duc de Buillon.

1435.

Rer. Burgūd.
lib. 4.

Gest. pontif.
Leod. in vita
Ioan. Heinsb.
cap. 16. tom. 3.

Princes de Se-
dan. Ducs de
Buillon.

Traicté entre
Charles VIII.
& le Duc de
Buillon.

1486.

Traicté de
Senlis.

1493.

de Bourgogne Comte de Nevers, &c. Ce qui est confirmé par Pontus Heuterus en son histoire des Ducs de Bourgogne: *Philippum sequebatur Arnoldus Geldria Dux, BVL-LONII DVX, Ioannes filius natu maximus Ducis Clinie, antistes Cameracensis & Leodiensis, &c.* Et Suffridus en sa Chronique des Ducs de Brabant, & en l'histoire des Euesques de Liege, fait souvent mention de ce Iean de Heinsbergues qu'il appelle *excellentissimum Principem*, & remarque que l'an 1421. luy & ses enfans, entre lesquels estoit l'Euesque de Liege, firent vn traicté de paix avec le Duc de Brabant: *Ioannes Heinsbergius cum filiis suis, inter quos & Episcopus Leodiensis fuit, pacis tractatum iniit cum Brabantis.*

Depuis, les Princes de Sedan ont possédé ce Duché. L'histoire manuscrite de Robert de la Mark Seigneur de Florenge, fils de Robert II. Prince de Sedan, & Duc de Buillon, porte que le Duché de Buillon estoit venu de son grand-pere qui estoit Robert I. & du Bellay en ses memoires, remarque que ledit Robert II. à qui l'Empereur Charles V. fit la guerre, estoit Duc de Buillon. D'où se peut recueillir que Robert I. du nom Prince de Sedan a esté le premier de ceste maison là, qui a possédé le Duché de Buillon enuiron l'an 1486. & apres luy Robert II. son fils, sur lesquels il fut pris par Maximilian Archiduc d'Autriche, à cause qu'ils estoient alliez du Roy Charles VIII. & l'auoient seruy contre luy. Et d'autant que par le traicté de ceste alliance qui est de l'an 1486. le Roy leur auoit promis & accordé de les faire comprendre aux traictés qu'il feroit avec ledit Archiduc & autres qui leur voudroient faire la guerre, ou porter aucun dommage à cause du seruice qu'ils luy rendoient, & de les ayder & secourir comme les Seigneurs de son sang & lignage, si à cause de ladite guerre ils estoient oppressez ou priuez de leurs places, ils furent compris au traicté de paix fait à Senlis le 22. May 1493. entre ledit Roy Charles VIII. & Maximilian I. Roy des Romains, & Philippes Archiduc d'Autriche son fils, par lequel fut conuenu, *Que tous ceux qui auoient seruy en ceste*

guerre de part & d'autre, rentreroient en la iouissance de leurs terres & seigneuries, pour en iouyr du iour de la paix, en tel estat qu'elles se trouueroient, & estre maintenus en pareille possession & iouissance qu'eux & leurs predecesseurs estoient auparauant l'empeschement suruenue à cause des guerres depuis l'an 1470. & dont à l'occasion d'icelles, & durant icelles ils auroient esté deposez, nonobstant quelques dons & dispositions, ou declarations de confiscation, qui pourroient auoir esté faites au contraire, tant par le Roy Louis XI. que par le feu Duc Charles & ledit Roy des Romains & leur party. En consequence duquel traicté, par vn autre particulier faict entre ledit Archiduc & ledit Robert II. du nom Duc de Buillon & Prince de Sedan le 27. Decembre 1496. fut specialement conuenue, *Traicté entre l'Archiduc Philippe & le Duc de Buillon.* Que ensuiuant la paix & traicté de Senlis ledit Robert de la Mark seroit reintegré es terres & seigneuries de Florenge & Comté de Cigny, & iouiroit aussi de la terre & seigneurie de B V I L L O N en l'estat où elle estoit. Ce qui fut executé, & le traicté de Senlis depuis confirmé & ratifié apres la mort du Roy Charles VIII. par le Roy Louis XII. son successeur, par traicté faict à Paris le 2. Aoust 1498. 1496.

Après le recouurement de ce Duché, Robert II. du nom Duc de Buillon & Prince de Sedan, fit reparer & fortifier le chasteau de Buillon: & parce qu'il auoit employé à ceste reparation les deniers qu'il auoit receus du dot de Catherine de Croy sa femme, il l'assigna sur iceluy & sur toutes ses dependances, ainsi qu'il se voit par acte du 18. Iuillet 1503.

Et l'an 1518. ledit Robert II. Duc de Buillon, & Erard de la Mark Euesque de Liege son frere, firent vn traicté de confederation & alliance defensue avec Charles d'Autriche Roy d'Espagne à saint Tron le 27. Aueil, par lequel fut conuenue, *Traicté de S. Tron entre le Roy d'Espagne & l'Euesque de Liege, & le Duc de Buillon.* Qu'il y auroit bonne amitié, intelligence & obligation mutuelle entre ledit sieur Roy Catholique & lesdits sieurs de Liege & de Sedan, & qu'ils seroient tenus le seruir enuers & contre tous, & ledit sieur Roy seroit aussi reciproquement tenu les ayder, favoriser, & assister enuers & contre tous, pour la conseruation & seureté de leurs Estats, garde, tuition, & 1518.

Traicté de
Bruxelles en-
tre le Roy
d'Espagne &
le Duc de
Buillon.

1519.

defence de leurs pays, &c. En execution de ce traicté en fut fait vn particulier avec ledit Duc de Buillon à Bruxelles le 7. Decembre ensuiuant, ratifié par le Roy d'Espagne à Sarragoce le 22. Ianuier 1519. par lequel fut conuenu: Que les places & maisons fortes de Sedan, Florenges, Iamets & Buillon seroient, & demeureroient durant la vie dudit Robert, au seruice dudit Roy Catholique, selon le traicté fait à saint Tron, & qu'apres son deceds, ses enfans, ou autres de par eux, qui occuperoient lesdites places, feroient serment audit Roy, ou à ses successeurs, de les seruir enuers & contre tous. Que s'il auenoit qu'il allast de vie à trespas auant Catherine de Croy sa femme, qu'elle tiendrait & possederait, sa vie durant, la maison, terre & seigneurie de BVILLON, ensemble tous les droicts, ventes & reuenus y appartenans. Et si elle se vouloit departir desdites maison, terre & seigneurie de BVILLON, faire le pourroit, & la mettre es mains de celuy de ses enfans, seruiteurs & tenans le party dudit Roy Catholique, ou de ses successeurs, à qui elle seroit ordonnée, en luy baillant & deliurant prealablement par celuy qui l'auroit & possederait, en deniers comptans, la somme de quinze mil liures du prix de quarante gros la liure, pour & à cause de semblable somme venant & procedant de son dot de mariage, laquelle auoit esté deboursée & employée par ledit Robert, à la reparation & fortification de ladite maison de BVILLON, &c. Ces choses ainsi passées & accordées, moyennant aussi traictement raisonnable, pour la garde & seureté d'icelles places, & qu'iceluy traictement fut entretenu en la maniere qui ensuit, à sçauoir que des huit mil liures de quarante gros que ledit Robert de la Mark auoit & prenoit dudit Roy, seroient ordonnées & employées à la garde de la place de Sedan deux mil liures: autres deux mil liures pour la maison de Iamets: autres deux mil liures pour la maison de Florenges, & pour la maison de BVILLON semblables deux mil liures.

Par ces traictes publics, & actes domestiques des années 1496. 1503. 1518. & 1519. & par les tesmoignages de l'histoire, laquelle fait foy en tel cas, il se voit clairement que le Duché de Buillon appartenait sans contredit à Robert I. & Robert II. Ducs de Buillon & Princes

ces de Sedan, lesquels en ont iouï paisiblement iusques en l'an 1521. que l'Empereur Charles V. en haine de ce que ledit Robert II. auoit renoncé à son alliance, pour prendre celle de France, & à cause de la guerre qu'il entreprit contre le seigneur d'Eymeries, & contre luy-mesmes, prit à force d'armes le chasteau de Buillon, & ce qui depend de ce Duché au delà de la riuere de Semoï, & le donna à l'Eglise de Liege l'an 1522. laquelle, à ce tiltre, en a iouï iusques en l'an 1552. qu'il fut repris sur Georges d'Autriche Euesque de Liege par les armes du Roy Henry II. & par luy restitué à Robert IV. Duc de Buillon petit fils de Robert II. sur lequel il auoit esté occupé.

Il est vray que Philippes II. Roy d'Espagne, au traicté fait à Chasteau en Cambresis l'an 1559. ayant insisté à ce que le chasteau de Buillon fust remis en la possession de l'Euesque de Liege en l'estat qu'il estoit auant le commencement de la guerre: ceste restitution fut promise par le Roy Henry II. (à la priere duquel le Duc de Buillon mit volontairement ce chasteau es mains de sa Majesté, parce qu'autrement la paix ne se pouuoit faire) mais ce fut aussi sans preiudice des droicts dudit Duc de Buillon, contre l'Euesque de Liege, pour lesquels iuger, & autres differends qu'il auoit contre les communautéz du pays de Liege, touchant des debtes, esquelles il pretendoit qu'elles luy estoient obligées, il fut conuenu par le mesme traicté qu'ils nommeroient des arbitres de part & d'autre. Voicy les termes de ce traicté: *Aussi se rendra à Mons. de Liege tout ce qui presentement s'occupe par ledit Seigneur Roy tres-Chrestien, ou par gens tenans son party, de ce que deuant le commencement de ceste guerre presente possédoit l'Euesque, Chapitre, Eglise, & pays de Liege, & specialement le chasteau de Buillon, sans rien en reseruer, pleinement, de bonne foy, en l'estat qu'il se trouue: & ce sans preiudice du droict que le Seigneur de Sedan & ceux de la maison de la Marche y peuuent pretendre: ains, ce faisant ladite restitution, leur sont reseruées leurs exceptions, pour par voye de iustice s'en pouuoir seruir respe-*

*Traicté de
Chasteau en
Cambresis.*

1559.

Etiennelement les uns & les autres, & non autrement. Et pour vider plus briuelement lesdits differens qui sont entre lesdits Euesque, Chapitre, & communautez de Liege, & ledit Seigneur de Sedan, se choisiront deux arbitres, l'un par lesdits Seigneur Euesque, Chapitre & communautez de Liege, & l'autre par ledit sieur de Sedan: lesquels se denommeront par les parties dans deux mois, pour se trouuer en la ville de Cambray, le premier de Septembre, où sommairement & de plain, & au plus tost que faire se pourra, ils videront lesdits differens, & tous autres que lesdits Seigneurs de Sedan, ont & peuuent auoir à l'encontre du corps & communauté de ladite ville: Et pour ce que Madame la Comtesse de Braine & ses coheritiers pretendent plusieurs choses à l'encontre du corps de ladite communauté de Liege, est aussi accordé que les mesmes arbitres auront pouuoir & charge de composer & vider lesdits differens d'entre eux. Ce que n'ayant esté executé, quoy que l'Euesque & les communautez de Liege en eussent esté plusieurs fois interpellé, il fut depuis accordé par le traicté de Veruins l'an 1598. entre le Roy Henry le grand & ledit Philippes II. Roy d'Espagne, *Quel'execution des choses contenues au precedent traicté de 1559. laquelle n'auoit esté faite, seroit paracheuée, spécialement pour le DUCHE' DE BVILLON, & que pour cet effect dedans six mois on nommeroit des arbitres & deputez de part & d'autre.*

*Traicté de
Veruins.*

1598.

*Demande du
Duc de Buil-
lon à l'Euesque
& Communau-
tez de Liege.*

Or à ce titre Monseigneur Frideric-Maurice de la Tour à present Duc de Buillon, ayant acquis tous les droicts & actions de la maison de Sedan, demande au iourd'huy à l'Euesque & aux communautez du pays de Liege, que suiuant lesdits traictés de Chasteau en Cambresis & de Veruins, & en execution d'iceux, ils ayent à nommer des arbitres pour vider ces diferends, tant pour ce qui concerne le chasteau de Buillon, & ce que l'Euesque de Liege occupe de ce Duché au delà de la riuiere de Semoy, que pour le payement de plusieurs sommes de deniers & arrerages d'iceux, à luy legitiment deubs, & ce pour causes iustes & fauorables, par obligations authentiques, mesmes en execution de traictés de paix faicts pour le bien & la liberté de leur pays.

Contre ceste demande si iuste & si legitime, ils font deux obiections: la premiere, que les choses demandées leur ont autresfois esté données durant la guerre, par l'Empereur Charles V. L'autre, que par la prescription l'Euesque s'est rendu propriétaire du chasteau de Buillon, & de ce qu'il possède de ce Duché: & que les communautéz ont aussi acquis la descharge des debtes, ausquelles elles estoient obligez.

Obiections de l'Euesque & Communautéz de Liege.

A ces obiections il y a des responces par lesquelles il se verra qu'ils sont mal fondez.

Responces du Duc de Buillon.

Ceste question se doit iuger partie par le droit de la guerre, & suiuant les traittez de paix faiçts en consequence d'icelle: partie par la disposition du droit commun, qui regle les prescriptions.

Or pour esclarcir le premier point, touchant le chasteau de Buillon, & ce que l'Euesque possède de ce Duché: il est besoin de recourir à la source, & sçauoir l'origine & la cause de la guerre que l'Empereur Charles V. fit à Robert II. Duc de Buillon l'an 1522. laquelle s'alluma depuis avec la France:

I. Point.

— *que tanti primordia belli.*

Tous les historiens l'attribuent au diferend qui arriua touchant la maison & seigneurie d'Hierges en Ardenne. Mais parce qu'ils en parlent legerement, & n'en rapportent les circonstances, nous les deduirons icy plus au long, les ayans recueillies de pieces authentiques, & de quelques histoires du temps non encorés imprimées, outre ce qu'en a escrit du Bellay au 1. liure de ses memoires sous l'an 1521.

Guerre de l'Empereur Charles V. contre le Duc de Buillon, & la cause d'icelle.

Il faut donc remarquer que la Seigneurie & Chastellenie d'Hierges, qui est vne des quatre Pairries du Duché de Buillon, appartenoit anciennement à Lancelot seigneur de Berlaimont, lequel auoit assigné sur icelle le douaire de Marguerite de la Mark fille de Guillaume de la Mark seigneur de Lumay, laquelle, à ce titre, en jouït durant sa vie. Depuis ceste seigneurie fut engagée l'an 1510. pour certaine somme de deniers à Iean de

La Chastellenie d'Hierges, Pairrie du Duché de Buillon.

Gest. pontif.
Leod. in vita
Erardi à Mar-
xa, c. 4. to. 3.

Cowaresme seigneur de Langly, lequel pour en auoir payement se la fit adiuger par autorité de justice. Ce nonobstant, le sieur d'Eymeries, qui auoit espousé Gilette de Berlaimont sœur & vniue heritiere dudit Lancelot de Berlaimont, pretendit qu'elle luy appartenoit à droit hereditaire, & luy deuoit estre restituée par ledit de Cowaresme, & à faute de ce faire, le fit assigner pardeuant le Preuost & Iuges ordinaires de Buillon, & par appel deuant les Pairs du Duché de Buillon Iuges naturels de ce differend: lesquels en premiere & seconde instance, apres cognoissance de cause, prononcerent contre le sieur d'Eymeries, lequel s'adressa à l'Empereur Maximilian I. de qui il estoit vassal à cause d'autres seigneuries qu'il auoit es Duchez de Brabant & de Luxembourg, pour estre receu appellant de ce iugement à la chambre Imperiale. Ce qu'il luy accorda facilement, (tant en haine de ce que le Duc de Buillon estoit allié de la France, que parce qu'il auoit assisté Philippes Electeur Palatin, & Robert son fils, en la guerre qu'ils firent l'an 1504. contre Albert Duc de Bauiere qui auoit espousé sa sœur, pour la succession de Georges dict le riche, Duc de Bauiere) & pour cét effect luy fit expedier vne commission au Chancelier & conseil de Brabant, pour en prendre cognoissance, & iour assigné au seigneur d'Hierges pour y respondre sur la demande du sieur d'Eymeries. Mais le seigneur d'Hierges ayant decliné la iurisdiction du conseil de Brabant, & representé que legitime-ment il n'auoit peu y estre assigné: le iugement donné à son profit, par les Pairs du Duché de Buillon n'estant sujet à appel, parce que de tout temps ils iugeoient souverainement & en dernier ressort, ne recognoissans, comme a remarqué du Bellay au lieu sus allegué, autre Roy ny seigneur que leur Duc: cela obligea ledit sieur d'Eymeries d'auoir encore recours à l'Empereur, lequel par ses lettres patentes du 7. Aoust 1517. de son autorité absolue & propre mouuement, remit les parties en tel estat que s'il eust esté bien & legitimelement appelé, se

Pairs du Du-
ché de Buillon
Iuges souue-
rains.

declarant Seigneur souuerain du Duché de Buillon, & que partant il auoit bien appellé à sa Majesté & chambre Imperiale, & en attribua la cognoissance audit Conseil de Brabant, lequel par defect iugea au profit dudit sieur d'Eymeries, sans auoir égard au iugement souuerain des Pairs du Duché de Buillon, lequel avec iustice ne se pouuoit reuoquer,

— *rescindere nunquam*

Dñs licet acta Deum.

Ce iugement du conseil de Brabant ne fut executé qu'après la mort de l'Empereur Maximilian, par l'autorité de Charles V. son successeur, lequel à main forte, contre toutes formes de iustice, fit mettre le sieur d'Eymeries en possession de la maison d'Hierges & ses dependances, sur laquelle, non plus que sur le Duché de Buillon, nul de ses predecesseurs auant l'Empereur Maximilian I. ny aucun de ses successeurs après luy n'auoient iamais pretendu aucun droit, iurisdiction ny superiorité, soit à cause de l'Empire, soit à cause des Duchez de Brabant ou de Luxembourg: le Duché de Buillon ayant esté sans contredit possédé de tout temps en tout droit de souueraineté, tant par Godefroy de Buillon Roy de Ierusalem, que par les Euesques de Liege, & autres seigneurs qui l'ont possédé, & en ont ioüy depuis.

Et la seigneurie d'Hierge a esté de toute ancienneté vne Chastellenie & Pairie dudit Duché: ainsi qu'il se voit en deux titres de l'an 1127. & 1140. ou Manasses d'Hierges (qui fut Connestable du Royaume de Ierusalem, ainsi que l'Archeuesque de Tyr l'a remarqué en son histoire) est nommé entre les Chastellains du Duché de Buillon: & en vn autre de l'an 1155. l'Empereur Frederic I. fait aussi mention du chasteau d'Hierges, entre les chastellenies & seigneuries appartenantes à l'Eglise de Liege, laquelle possédoit lors le Duché de Buillon en toute souueraineté: lesquels titres sont rapportez par Gilles d'Orual en la vie d'Adalberon & Henry II. Euesques de Liege. Et se voit vn hommage de l'an

La Chastellenie d'Hierges Pairie du Duché de Buillon.

Guil. Tyr. lib. 12. de bello sacr. cap. 1.

Gest. pontif. Leod. cap. 40. & 41. tom. 3.

1529. fait à Erard Euesque de Liege (qui iouïssoit lors de Buillon par don de l'Empereur Charles V.) de la Pairrie & Seigneurie d'Hierges par la Dame de Berlaimont, lors vesue du sieur d'Eymeries, laquelle en iouïssoit en vertu du iugement du conseil de Brabant dont a esté parlé cy dessus.

Et dautant que ceste execution faite par force estoit vne entreprise manifeste, sur les libertez & franchises du Duché de Buillon: & qu'il s'agissoit en cela des droicts principaux de ceste dignité & Seigneurie souveraine, *de summa iudiciaria potestate seruanda*, le Duc de Buillon prit la cause du seigneur d'Hierges son vassal, pour le proteger & defendre contre ceste violente procedure: & apres en auoir fait plainte à l'Empereur, & à Madame Marguerite de Sauoye sa tante, qui gouuernoit lors les pays bas: sans en auoir peu obtenir aucune satisfaction, ny contentement, il renonça à l'alliance qu'il auoit avec luy, & eut recours à celle de France, & se mit en la protection de la Couronne, par traité fait avec le Roy François I. à Romorantin le 14. Feurier 1520. Et pour auoir raison du tort & iniustice qui luy auoit esté fait, il commença la guerre au sieur d'Eymeries, & la denonça aussi à l'Empereur qui l'assistoit, & fit plusieurs actes d'hostilité dans le pays de Luxembourg, où il assiegea Virton, qu'il eut pris en peu de temps par composition ou par force, si le Roy François I. sur la plainte que fit l'Empereur de ceste entreprise, comme si elle estoit fauorisée de luy, & faite à son instigation, ne l'eut obligé de se retirer & licencier son armée, ce qu'il fit le 22. Mars 1521. Mais l'Empereur le voyant desarmé, enuoya le Comte Henry de Nassau avec vne puissante armée, pour attaquer le Duché de Buillon & les places du Duc, dont aucunes furent assiegées & bien defenduës: mais s'estant trouué trop foible pour vn si puissant aduersaire, la France estant demeurée paisible, sans luy donner aucun secours ny assistance, pour ne contreuenir aux traictez, il en perdit quatre des principales, à sçauoir Logne, Mes-

Duc de Buillon fait la guerre à l'Empereur.

Memoires du Bellay, l.ii. 1.

fancourt, Florenge, & Buillon: dont l'Empereur s'estant contenté, *nihil amplius victo eripere arbitratus, præter iniuriæ licentiam*, comme dit Saluste, il luy accorda vne trefue de six sepmaines, pendant laquelle il se mit en estat d'attaquer la France du costé de Champagne, & d'exercuter plus puissamment le dessein qu'il en auoit auparauant, ayant commencé la guerre par la prise de Mouson au mois de Septembre en ladite année 1521.

Trefue accordée par l'Empereur au Duc de Buillon.

La cause de la guerre faite par le Duc de Buillon est clairement expliquée en l'histoire des Euesques de Liege, laquelle, ainsi que les autres historiens, l'attribuë à l'entreprise faite sur les droicts de son Duché, recognoissant par là la possession en laquelle il en estoit lors. *Robertus Markanus*, inquit, *à fœdere quod non ita pridem cum Brabantis pepigerat, recessit, cuius hæc causa fuisse putatur. Markanus cum de temeratis, occasione domini de Hierges, priuilegijs Bullionensibus, sapè apud Cæsarem ipsiusque Cancellariam, querelam deposuisset, videretque se oleum operamque perdere: querendam aliunde opem ad vindicandam iniuriam ratus, sibi Gallie Regem reconciliandum existimauit. Quo haud difficulter impetrato, non solum fœderi renunciauit, sed & missis VVormatiam, ubi Cæsar comitiis intererat, fœcialibus, ipsi bellum non minus infelicitè quàm temerè indixit, &c.*

Gesta pontif. Leod. in vita Erardi à Marka, c. 11. t. 3.

Et d'autant qu'en cestè guerre Erard de la Mark Euesque de Liege, auoit assisté de tout son pouuoir le Comte de Nassau Lieutenant general de l'Empereur, contre le Duc de Buillon son frere, à qui il portoit vne indignation & inimitié extrême, parce qu'il auoit quitté l'alliance de la maison d'Autriche: l'Empereur luy donna & à l'Eglise de Liege, le chasteau de Buillon, & ce qu'il auoit conquis de ce Duché au delà de la riuere de Semoy: le Duc de Buillon ayant conserué ce qui est au deçà, entre les riuieres de Meuse & du Cher, dont luy & ses successeurs ont tousiours depuis iouï paisiblement iusques à present.

Chasteau de Buillon pris par l'Empereur, & donné à l'Euesque de Liege.

Il est fait mention de ce don de l'Empereur au traicté de paix fait à Cambray l'an 1529. qui porte, *Que si*

Traicté de
Cambray.
1529.

Meſſire Robert de la Mark ou ſes enfans, vouloient entreprendre ſur le chasteau & Duché de Buillon conquis par l'Empereur, & donné par iceluy à l'Egliſe de Liege, le Roy ne leur donneroit ayde ny faueur directement ny indirectement. Et on en demeure d'accord comme d'une choſe notoire, & qu'a ce tiltre depuis l'an 1522. les Eueſques de Liege en ont ioüy iuſques en 1552. qu'il fut repris: les armes royales de France ayans conſerué au Duc de Buillon ce que les Imperiales luy auoient arraché.

Don de l'Em-
pereur, nul.

Il faut maintenant examiner ſi ce don de l'Empereur eſt valable, & ſ'il a peu donner & transporter à l'Eueſque de Liege ce que par violence & ſans iuſtice il auoit conquis ſur le Duc de Buillon.

Cicer. lib. 7.
de Officiis.

Il eſt aiſé à recognoiſtre que les Empereurs Maximilian I. & Charles V. par vne prudence d'eſtat, auſſi bien que pour vanger leurs paſſions priuées, plus que pour iuſte & legitime ſujet qu'ils en euſſent, porterent leur autorité & leur pouuoir pour affoiblir le Duc de Buillon, en ſ'asſurant de ſes places fortes ſur la frontiere de Champagne: afin de luy oſter & à la France, de laquelle il eſtoit allié, les moyens de leur nuire & à leurs pays, ainſi que luy & ſes predeceſſeurs auoient faiët aupara-
uant en toutes les guerres entre la maiſon de France & celle de Bourgogne. C'eſt ce que diſoit vn ancien: *Ille quidem iniuria, quæ nocendi cauſa de induſtria inferuntur, ſæpe à metu proficiſcuntur, cum is qui alteri nocere cogitat, timet, ne ſi id fecerit, ipſe aliquo afficiatur incommodo.* Le differend d'Hierges leur en donna l'occaſion & le pretexte, & la guerre que le Duc de Buillon, à cauſe d'iceluy, fit dans le pays de Luxembourg, laquelle eſtoit iuſte, puis qu'il la faiſoit pour maintenir & defendre les droits de ſa ſouueraineté, & empescher ſes ſubjets d'oppreſſion & de violence: encor que l'iſſuë n'ait reſpondu à la iuſtice de la cauſe: *Nec ideo felicia bella, quia iuſta ſunt, nec tam exitu eorum quàm principijs, quòd non ſine cauſa ſuſcepta, eſtimanda.* Par là il eſt aiſé à iuger ſ'il meritoit d'eſtre ainſi mal traité, & preſque deſpoüillé de ſon eſtat, voire il ſe peut dire

dire que par ceste occupation violente, laquelle ne se peut defendre par raison ny par iustice, l'Empereur ne s'estoit point acquis de droict, & qu'ainsi il ne l'a peu donner à vn autre, *Nec enim belli iniuria, actoris vim passi iura sustulit, atque exceptione perpetua succurritur ei qui per vim expulsus fuerit l. licet ff. de Exceptionibus.* Et comme dit Quintilian à ce propos, *Ius donari à victore non potuit, quia id demum sit eius, quod ipse teneat: atque bello paria & armis erepta, non nisi armis eadem vi possidentur. Ius verò quod sit incorporale, apprehendi manu non potest.*

Mais posé que l'Empereur ait eu ce droict, & par consequent l'Euesque de Liege, qui ab eo causam habuit, le Duc de Buillon a depuis repris par les armes ce qui auoit esté occupé sur luy, — *mediòque ex hoste recepit.* la chose ayant esté recouurée par les mesmes voyes qu'elle luy auoit esté ostée, & avec plus de iustice, *Ius acquisitionis illius bellica intercidit, atque pristinum ius suum recuperauit.* C'est ce que dit le Iurisculte Pomponius en la loy 20. *ff. de capt. & postl. reuers. Expulsis hostibus ex agris quos ceperint, dominia eorum ad priores dominos redire.* Et Paul en la loy 19. *ff. eod. Quod bello amisimus, hoc si rursum recipiamus, dicimur postliminio recipere.* Il a esté remis en tel estat qu'il estoit auparauant, & reintegré en la iouissance & iuste possession de son heritage, dont le droict & la propriété luy estoient demeurez: *Quicquid Caesar iure belli partum possidebat, donauit: ius tamen dominij mutare non potuit.* La chose est retournée au mesme estat qu'elle estoit auant qu'elle fust occupée, *quasi in medio captiuitas nulla intercessisset, l. 12. §. 5. ff. eod. & postliminio ei omnia restituuntur iura, & in eam causam venit, in qua futurus esset, perinde ac si captus ab hostibus non fuisset. l. 5. & 12. §. 6. & 15. ff. eod.* Il auoit tousiours eu l'esperance de recouurer ce que l'ennemy luy auoit occupé, & de l'en chasser, & ceste occupation violente n'a en rien diminué son droict. A ce propos est notable ce qui est rapporté en l'histoire Romaine, que Hannibal Tit. Liu. lib. 6. apres auoir obtenu quatre grandes victoires contre les Romains, se vint camper à deux lieuës de Rome, sur vn

heritage, que les creanciers de celuy à qui il appartenoit faisoient decreter. Et combien qu'il fust occupé par l'ennemy, neâtmoins, pour la grande esperance qu'ils auoient de l'en chasser, & recouurer ceste terre, il ne laissa de trouuer plusieurs encherisseurs & d'estre vendu son iuste prix; ce qu'ayant esté sceu par Hannibal il perdit l'esperance de prendre Rome, *Quod agrum, in quo castra haberet, venisset, nihil ob id diminuto pretio: eiusque soli, quod ipse bello captum possideret, haberetque, Roma emptor inuentus esset.*

Et ne seruiroit en ce faict de dire que le chasteau de Buillon n'a esté repris en la mesme guerre, suiuant la loy §. §. i. ff. de capt. & postlim. reuers. si eodem bello is reuersus fuerit, postliminium habet. Car encor que depuis la rupture de la paix de Noyon il y ait eu diuers traictez faicts entre le Roy François I. & l'Empereur, à sçauoir à Madril en 1526. Cambray 1529. & Crespy 1544. ç'a pourtant esté vne mesme guerre, & entre mesmes personnes: & comme vne paix iniuste ne peut durer longuement, ces traictez furent quasi aussi tost rompus que passez, la fin d'une guerre n'ayant esté que le commencement de l'autre.

Nullité des
traictez de
Madril.
Cambray.
& Crespy.

Et se peut dire qu'il n'y a point eu de paix assurée iusques en 1559. entre le Roy Henry II. & Philippes II. Roy d'Espagne. Les nullitez du traicté de Madril (qui est le fondement des deux autres, lesquels en ont esté tirez presque de mort à mort) sont assez cogneuës: & la France a toujours reclamé contre la violence de ces traictez, qu'on n'a iamais estimez valables ny obligatoires, comme faicts seulement pour la necessité du temps, & la difficulté où estoient lors les affaires du Royaume: le premier ayant esté fait, le Roy François I. estant prisonnier en Espagne: le second, les enfans de France y estans en ostage pour la liberté de leur pere: & le troisieme, l'Empereur rauageant la France d'un costé & le Roy d'Angleterre de l'autre. Aussi furent-ils incontinent rompus, & la guerre de nouveau commencée qui dura iusques en 1559. que fut fait le traicté de Chasteau

en Cambresis, sous lequel on a vescu iusques à la nouuelle ouuerture de guerre de l'an 1595. suiuiue du traicté de Veruins en l'an 1598.

D'ailleurs ces traictez ne se peuuent estendre au Duc de Buillon, ny estre tirez à consequence à l'encontre de luy: la guerre que luy fit l'Empereur, en laquelle fut pris le chasteau de Buillon, n'ayant rien de commun avec celle qu'il fit depuis contre la France, ainsi qu'il se peut recueillir des escrits publiez de la part du Roy François contrel'Empereur, qui taschoit de persuader qu'il auoit le premier rompu la paix, ayant fait commencer la guerre par le Duc de Buillon. Voicy les termes de l'Apologie qui en fust faite lors de la seconde guerre;

Dico & priore bello, & eo quod accendi hoc tempore videmus, semper Casarem fuisse prouocatorem: contra, Regem semper illata tantummodo bella propulsasse. Atque ut de priore bello prius dicam, quod causatur Casar bellum in se à Roberto Marchiano natum, conflatum, susceptum Regis impulsu & operâ fuisse, ostendam nihil horum esse, contraque habere omnia. Etenim ita se res habuit, simultatem & litem primum, deinde bellum fuisse ortum inter hunc Robertum & Eymertianum regulum, idque de eius castelli controuersia cui nomen est Hiergia. Contigit verò ut Marchianus, qui Francico regno esset finitimus, cuius etiam liberi & maximas haberent opes in Gallia, & honores gererent quam amplissimos, ei bello gerendo & sustinendo militem ex Gallia eduxerit: sed hoc proculdubio & insciente, & tum grauiter egrotante Rege fecit: qui postquam è morbo recreatus id rescivit, nihil prius habuit, quam ut Casaris ad se legatum vocaret, seque non modò apud eum diligentissime purgaret, verùm aduersus Marchianum quoque profiteretur sese, ubi rogaretur, auxilio Casari affuturum. Nec cunctatus, missò confestim nuntio, Gallicum militem edicto grauissimo reuocauit: cum iam Viritonum oppidum, quod tum Marchianus oppugnabat, prope ut dederetur, aut vi caperetur, esset. Quo milite reuocato, Marchianus non tantum obsidione soluere, sed salutem etiam suam consulere coactus est: neque ita multo post oppida non pauca, & ex suis arces haud ignobiles, vi aut ditione captas amisit. Casarisque milites non contenti Marchiani

Epist. Apolog.
de reb. inter
Regem & Ca-
sarem contro-
uersis, pag. 82.

Resp. Reg.
Gal. ad orat.
quâ Cæsar in
cum Romæ
inuentus est,
pag. 113.

Memoires du
Bellay, liure 1.
fol. 29. 32. 33.
35. & 37.

multatione, in Galliam irruerunt, & ante quàm Rex sibi esse de bello cogitandum arbitraretur, Mosonem oppidum ad deditio- nem compulerunt, Maccias oppidum obsederunt. Le Roy François le tesmoigne luy-mesme en la responce qu'il fit à vn escrit que l'Empereur auoit publié à Rome, In Robertum Marchianum, ego Caroli oratori etiam auxilium, si rogaret, ex fœdere, me laturum obtuli: & militem quem Robertus in regno meo, insciente me, conscripserat, statim ubi ad aures meas permanauit, grauissimis edictis reuocauit: nec id sine magno Roberti incommodo, qui præter spem ab eo milite nudatus, haud ignobiles arces non ita multo post vi ac deditioe captas amisit. Ce qui est aussi confirmé par du Bellay en ses Memoires, où il traite au long l'origine & le progres de la guerre de l'Empereur contre le Duc de Buillon, auant qu'il eust denoncé la guerre contre la France.

Aussi le Duc de Buillon ne fut pas compris aux susdits traictez de Madril & de Cambray: au contraire, par iceux l'Empereur obligea expressément le Roy François I. de l'ayder & assister contre ce Duc, en cas qu'il fist quelque entreprise pour reconuer le chasteau & Duché de Buillon, par luy conquis, & donné à l'Eglise de Liege: recognoissant bien par là, qu'il auoit droit de le faire quand il en trouueroit l'occasion, laquelle par le moyen de ces traictez l'Empereur taschoit de luy oster. Que s'il ne le fit plus tost par la voye des armes, c'est qu'il en fust empesché, *nec currit præscriptio impedito agere.* Et cét empeschement se recognoist assez par le mauuais traictement que luy auoit faict l'Empereur, qui le despoüilla presque de son estat. Que s'il eust recommencé la guerre pour recouuer ce que luy detenoit l'Euesque de Liege, qui auoit l'Empereur pour garand du don qu'il luy auoit faict; & avec lequel il estoit tres-estroitement allié, il eust attiré sur luy les forces tant de l'Empereur que du Roy de France, & se fust trouué trop foible contre deux si puissans aduersaires.

Aussi pour cela il n'y a point de temps limité contre les Princes souuerains, & comme disoit Demosthene con-

tre Macartatus, *Qui aliena iniuste tenuit diu, non sibi placeat propterea, sed fortuna imputet, quæ dominos impedit.* C'est la resolution de ceux qui ont traité du droit de la guerre.

Si non valenti agere, non currit prescriptio, videri potest nec hic currere, ubi Princeps, qui agere & mouere bellum habet, facile possit dicere, neque se, neque predecessores suos potuisse mouere bellum.

Alber. Gentil.
de iure belli,
lib.1. cap. 22.

Par là appert que la possession violente & forcée dont l'Euesque de Liege aioüy à cause de la guerre, s'estant esuanoüye, l'autorité de ce pretendu don de l'Empereur est aussi demeurée inutile & de nul effect: tant s'en faut qu'elle ait peu estre fortifiée par le temps, ny induire vne prescription legitime: moins entre Princes souuerains, comme sont l'Euesque de Liege & le Duc de Buillon, pour choses qui dependent de leurs estats & souuerainetez, n'y ayant point de loy, qui ait precisément réglé le temps de telles prescriptions, ainsi qu'entre les particuliers, ausquels il est aisé d'agir les vns contre les autres, la iustice leur estant commune & ouuerte. Mais les Princes souuerains n'ont point de Iuges, deuant lesquels ils puissent faire les procedures necessaires pour interrompre la prescription, il n'y a que la voye des arbitres, quand ils en peuuent conuenir, pour accorder leurs differends & contentions: & entr'eux la prescription ne se doit fortifier que par des siecles entiers. Et quand bien les Principautez & Seigneuries souueraines se pourroient prescrire par vn temps certain & arresté, qui ne pourroit, en tout cas, estre moindre que de cent ans: ainsi qu'autresfois il a esté ordonné pour l'Eglise (ceste longue possession faisant presumer que l'on en auroit abandonné les droits à ceux qui les possèdent) l'Euesque de Liege ne pourroit pourtant se preualoir de ce long temps, pour confirmer la possession violente, par le moyen de laquelle il pretend auoir acquis la propriété du chasteau de Buillon, & de ce qu'il tient de ce Duché. Car de la reprendre dès le temps que le don luy en fust fait par l'Empereur l'an 1522. il ne seroit pas raison-

L'Euesque de
Liege ne se
peut preualoir
de la prescrip-
tion.

Alber. Gentil.
de iure belli,
lib.1. cap. 22.

nable, par la regle commune, *non valenti agere non currit prescriptio*. A cela repugne la mauuaise foy dont vſa lors ledit Eueſque, lequel ſe monſtra ſi ennemy de ſon propre ſang, que de faire arracher à ſon frere, par la force des armes, l'heritage que leur pere commun luy auoit laiſſé par ſucceſſion: afin de profiter ſeul de ſa deſpoüille, ainſi qu'il a faiſt, contre tout droict de nature & de pieté: *Quia non ius, ſed vis & iniuria eſt, atque hoc ius acquirendi dominij per vim odioſum eſt*. De ſorte que tant qu'il a veſcu, à ſçauoir iuſques en l'an 1538. qu'il eſt mort, il n'a peu preſcrire, *Iure bellica illius poſſeſſionis*, ny ſes ſucceſſeurs apres luy, leſquels ne peuuent alleguer aucune iouiſſance legitime, pour ſe maintenir en leur iniuſte detention: puis qu'ils n'en ont eu autre tiltre que la mauuaife foy de leur auteur: *mala enim fides authoris nocet ſucceſſori, adeo vt nec vti poſſit acceſſione temporis, nec à ſe preſcriptionem inchoare*.

D'abondant ils'en faut beaucoup que leur poſſeſſion ſoit ſi longue, & telle qu'il la faut, pour en acquerir tiltre: car elle a eſté maintesfois interrompuë à cauſe des guerres, qui ont eſté preſque continuelles depuis l'an 1521. entre les Roys François I. & Henry II. & l'Empereur Charles V. & Philippes II. Roy d'Eſpagne iuſques à la paix de 1559. ainſi qu'il ſe verifie par l'hiſtoire & par les diuers traictez de paix ſur ce faiſts, à ſçauoir à Madrid en 1526. à Cambray 1529. & par le traicté de la trefue generale faite à Nice en 1538. au mois de Iuin, ſuiuie du traicté de paix faiſt à Creſpy en Laonnois en 1544. Et la guerre ayant recommencé en 1551. il ſe fit vne trefue à Vaucelles l'an 1555. en Feurier, laquelle fut rompuë l'an ſuiuant, & la guerre continua iuſques à la paix faite à Chateau en Cambreſis en 1559. Et outre ces interruptions ſi frequentes, il eſt notoire que le chateau de Buillon fuſt repris au mois de Iuillet 1552. dans les trente ans de l'vſurpation qui en auoit eſté faite par l'Eueſque de Liege, ſous pretexte du don de l'Empereur, ainſi qu'il a eſté remarqué par M^r de Thou en ſon hiſtoire:

Diuers traictez de paix & de trefue, depuis 1522. iuſques en 1559.

Chateau de Buillon repris par le Duc de Buillon.

1552.

*Capto, inquit, Bullonio, Marcianus cetera Principatus illius op-
pida ac vicis in potestatem nullo negotio redegit, tricesimo, post-
quam inde à Cesarianis eiectus fuerat, anno.* Et l'histoire des
Euesques de Liege en la vie de Georges d'Austriche
*Anno 1553. Aprilis 14. Guillelmus de Horion praefectus Ducatus
Bullionensis, qui annis triginta administratione castri praefuerat,
damnatur capitis.* Ainsi le temps de la prescription n'au-
roit peû commencer à courir que du iour que la demâde
semble auoir peû estre faite en vertu du traicté de paix
de 1559. par lequel, encor que la possession du chasteau
de Buillon ait esté restituée par le Roy Henry II. le Roy
d'Espagne ayant imposé ceste loy à ce traicté qui ne se
pouuoit faire autrement: cela pourtant n'a pas affoibly
ny diminué le droict du Duc de Buillon, au contraire,
l'a conserué & affermy, ayant par ce traicté repris sa for-
ce & vertu: puis qu'il luy reserue la faculté d'agir & de
vindiquer ce qui appartenoit à ses predecesseurs, parde-
uant des arbitres qui deuoient estre nommez de part &
d'autre, pour vuidier le differend qu'il auoit avec l'Eues-
que de Liege; lequel n'a peû non plus prescrire, *iure il-
lius restituta possessionis.* Car quand la prescription auroit
peû courir du temps de la publication de la paix de 1559.
elle se trouue encor souuent interrompuë par les mino-
ritez, lesquelles ont esté depuis presques continuelles en
la maison de Sedan. Car Henry-Robert, qui succeda à
Robert IV. l'an 1556. n'auoit lors que quinze ans, estant
né l'an 1539. le 6. Feurier: & lors qu'il fut majeur il se mit
en deuoir de satisfaire au traicté de 1559. & nomma pour
arbitres Guillaume Duc de Iuliers & de Cleues, & Her-
man Comte de Newenar, lesquels mesmes furent autho-
risez pour cét effect, par lettres patentes de l'Empereur
Maximilian II. du 29. Mars 1566. Mais l'Euesque de
Liege, au lieu d'y satisfaire de sa part, voulut troubler le
Duc de Buillon en la iouissance de ce qu'il tenoit deçà la
riuiere de Semoy, dont le Roy Charles IX. par lettres
du 7. Auril en la mesme année luy fit plainte, comme
d'vne entreprise faite au preiudice du traicté de paix: à

Historia Aug.
Thuani, li. 10.
an. 1552.

Gest. pontif.
Leod. in vita
Georg. Austr.
c. 5. & 6. to 3.

Minoritez en
la maison de
Sedan.

*Traicté proui-
sionnel entre
l'Euesque de
Liege & le
Duc de Buil-
lon touchant
la Forest de
Buillon.*

1573.

*Prince de Se-
dan compris
au Traicté de
Veruins.*

quoy l'Euesque fit responce par lettres du 17. May en-
suivant, *Qu'il tiendroit la main à ce qu'il ne fust rien fait par
les siens, au preiudice dudit traicté, ny qui peust donner de mes-
contentement à sa Majesté.* En suite dequoy, apres plusieurs
conferences entre les deputez dudit Euesque & du Duc
de Buillon, fut fait vn traicté à Buillon le 14. Iuin 1573.
par lequel, sur les differends lors suruenus touchant les
limites de la Forest de Buillon, fust conuenu, par proui-
sion, qu'elle seroit partagée par moitié, & que l'Euesque
iouiroit de la part qui estoit du costé de Buillon, au delà
de la riuere de Semoy: & le Duc de Buillon de l'autre,
qui est au deçà vers Sedan: & qu'il ne se feroit aucun
fort de nouueau de part ny d'autre sur les lieux conte-
nus audit partage: & en cas qu'il se rencontrast quel-
que difficulté en l'execution dudit traicté, le Duc de
Iuliers & de Cleues fust choisi pour arbitre. Et por-
te la procuration du Duc de Buillon baillée à ses depu-
tez le 10. Iuin 1572. que c'est sans preiudice du droict
qu'il auoit tant au chasteau de Buillon, ses appartenan-
ces & dependances, qu'autres droicts & actions à luy re-
seruez par le traicté de Chasteau en Cambresis. Audit
Henry-Robert, qui mourut l'an 1574. le 2. Decembre
succeda Guillaume-Robert son fils, dernier Duc de
Buillon de ceste maisonlà, n'ayant pas encor treize ans,
estant né le 1. Ianuier 1562. & à Guillaume, Charlote sa
sœur vnique le 1. Ianuier 1588. aagée seulement de trei-
ze ans, étant née le 5. Nouembre 1574. & mourut l'an
1594. le 15. May. Henry de Bourbon Duc de Montpen-
sier, qui auoit esté substitué par le testament du Duc
Guillaume, luy succeda aagé seulement de vingt ans, &
par transaction du 24. iour d'Octobre 1594. ceda ses
droicts à feu Monsr. Henry de la Tour, premier Mares-
chal de France, lequel à ce tiltre deuint Duc de Buillon
& Prince souuerain de Sedan & Raucourt: & en ceste
qualité, comme allié & confederé de la Couronne de
France, fust compris au dernier traicté de paix fait à
Veruins l'an 1598. par lequel son action luy fust renou-
uellée

uellée & conseruée entiere, à l'encontre de l'Euesque de Liege: ayant esté expressément conuenu par iceluy, que pour le regard des choses conuenues au traité de 1559. qui n'auoient esté executées, l'execution en seroit faite & paracheuée, en ce qui en restoit à executer, spécialement pour le Duché de Buillon, & tous autres differends, qui n'auoient esté vuidez & decidez: & que pour cét effect on nommeroit des arbitres & deputez de part & d'autre, iesquels s'assembleroient pour cét effect dans six mois és lieux dont les parties conuiendroient. A quoy n'ayant esté satisfait de la part de l'Euesque & Communauté de Liege: ledit Duc de Buillon, par lettres du 29. Nouembre 1604. fit demande audit Euesque, tant du chasteau de Buillon, & de ce qu'il tient de ce Duché, que des debtes, auxquelles les Communautés de Liege luy estoient obligez: à quoy il fit responce le 19. Aueil 1605. *Que donnant vne ouuerture specifique de ses pretentions, il feroit donner ordre que le tout se vuidast par amiable conference & communication: & de luy donner satisfaction, selon qu'en droit & raison seroit trouué conuenir:* Laquelle declaration & iustification desdites pretentions fut deliurée au Chancelier de Liege au mois de Iuillet ensuiuant. Audit Duc de Buillon qui mourut le 23. Mars 1623. a succedé Monf. Frideric-Maurice de la Tour son fils aisné, à present Duc de Buillon, n'ayant lors que dix-sept ans, estant né le 24. Octobre 1605. lequel ayant atteint l'aage de majorité, a aussi interrompu la prescription par la demande qu'il en a renouuellée par lettres à l'Euesque de Liege qui est aujourd'huy, & ceste demande fortifiée des lettres du Roy Tres-Chrestien à mesme fin l'an 1630. & 1631.

Parce que dessus est suffisamment verifié que ceste longue suite d'années, dont l'Euesque de Liege se veut preualoir depuis l'an 1522. a esté valablement interrompue, tant par les actes cy dessus representez, que par les guerres & minoritez, le temps desquelles déduit, il ne se trouuera pas de temps suffisant pour prescrire quelque

seigneurie que ce soit, moins vne souveraineté telle que le Duché de Buillon, lequel appartient iustement & legitiment à Mons^r. le Duc de Buillon, vray heritier & propriétaire d'iceluy au droit de ses predecesseurs, qui l'ont possédé depuis plus de cent cinquante ans, & se sont conseruez le tiltre de Ducs de Buillon, & pour tels ont tousiours esté recogneus par les Papes, par les Empereurs, les Roys, & autres Princes de la Chrestienté, au veu & sceu des Euesques de Liege, *semperque significatione voluntatis ius suum retinuerunt*: & partant le chasteau de Buillon & ce dont ils ont iouy, luy doit estre restitué avec les fruiçts qui en ont esté perceus, depuis l'iniuste & violente detention, iusques à present, ausquels sont tenus tous possesseurs de mauuaise foy.

(II. Point.

Voila pour ce qui concerne le chasteau de Buillon, & ce que l'Euesque de Liege possède. Voyons maintenant si les Estats & Communautéz du pays de Liege se trouueront mieux fondez en la descharge qu'ils pretendent auoir acquise des debtes qui leur sont demandées.

Ils demeurent d'accord des debtes, mais ils pretendent aussi qu'elles leur ont esté données durant la guerre, par l'Empereur Charles V. ainsi qu'autres fois ceux de Durazzo respondirent à vn certain personnage qui leur faisoit pareille demande, *Pecuniam debitam non est dubium, nec Dyrrachini inficiantur, sed sibi donatum as alienum à Cesare dicunt*.

Debtes deües
par les Com-
munautéz de
Liege à la
maison de
Sedan.

L'histoire des Euesques de Liege, en la vie d'Erard de la Mark, fait mention de ces debtes & de la demande laquelle en fut faite aux Magistrats & Conseil de la Cité de Liege, enuiron le temps que le Comte de Nassau, au nom de l'Empereur, fit la guerre au Duc de Buillon, à sçauoir l'an 1521. & parle aussi du don que les defendeurs pretendent leur en auoir esté fait lors par l'Empereur, aussi bien que du chasteau de Buillon à leur Euesque.

Gest. pontif.
Leod. in vita
Erardi à Mar-
ka, cap. 11. §. 3.

Voicy les termes: *Sed & Bullonium contendit (Nassonius) ac praesidiarijs auro corruptis, arcem aliqui inexpugnabilem, occu-*

pat. Sub hac Comes de Braine & de Rouci, Guillelmi quondam Markani filius, ciuitatem patriamque patri multa debere causatus, magistratui consilioque ciuitatis minaces literas pro debiti solutione assequenda scripsit: sed contra Caesar datis literis omnia que vel Ciuitas, vel priuati ciues seu Gallo seu eius adherentibus debere possent, iure belli fisco suo adscripta esse, seque illa liberaliter condonare Ciuitati rescripsit. Ce qu'ils veulent encor confirmer par le traicté de Paix fait à Cambray l'an 1529. par lequel fut conuenu, *Traicté de Cambray & de Crespy. 1529. & 1544.* Que toutes debtes, meubles & arerages donnez par lettres patentes de l'Empereur ou du Roy de France, à tiltre de confiscation, & qui auroient esté quittez, leuez & payez durant la guerre qui auoit esté entr'eux, leurs alliez & leurs pays & subjects, auant le traicté de Madrid, demeureroient perpetuellement donnez & quittez au profit desdits Seigneur, leurs vassaux, pays, villes & subjects, & leurs alliez, qui auoient esdites guerres tenu le party de l'un ou de l'autre, ausquels lesdits dons pourroient auoir esté faicts, ou de leur ayans cause, &c. Ce qui est repeté de mot à mot au traicté de Paix fait à Crespy en Laonnois l'an 1544. notamment pour le regard des alliez, lesquels durant la derniere guerre auoient tenu le party de l'un ou de l'autre.

Mais tant s'en faut que les defendeurs se puissent preualoir avec raison de ceste pretenduë descharge: qu'au contraire, il se trouuera qu'elle est imaginaire, & qu'ils l'alleguent sans aucun fondement, & ne scauroient représenter aucunes patentes de l'Empereur, par lesquelles, apres auoir confisqué ces debtes, selon les formes & solemnitez requises en tel cas, il leur en ait fait le don & la remise qu'ils pretendent, laquelle par ce moyen ne se trouuera pas mieux fondée esdits Traictéz. Et quand cela seroit, il se peut soustenir par de bonnes raisons, que l'Empereur ne l'a peu faire, ainsi que nous deduirons cy apres.

Don fait par l'Empereur des debtes du pays de Liege, nul.

Or pour bien esclarcir ceste question, il est besoin de reprendre ce que nous auons dit cy dessus de la guerre que l'Empereur fit au Duc de Buillon l'an 1521. en laquelle il luy prit le chasteau de Buillon, & le donna l'an

fuiuant à l'Eglise de Liege. Ceste guerre estoit particuliere, & n'auoit rien de commun avec celle qui se fit depuis entre l'Empereur & le Roy de France, ainsi qu'il a esté remarqué cy dessus, quoy que les historiens Espagnols & Italiens en la vie de l'Empereur Charles V. veulent, pour iustifier ses armes, faire croire que ceste guerre qui se fit en Ardenne, auoit esté suscitée par le Roy François I. & que par ce moyen il rompit le premier la paix, ayant aydé & fauorisé le Duc de Buillon contre le traicté de Noyon, qui portoit qu'ils ne donneroient ayde, faueur, ny assistance à ceux qui leur voudroient nuire. Mais tant s'en faut que cela soit, qu'au contraire, il se verifie par les plus fideles historiens de ce temps là, & par diuers actes publics que le Roy fut si retenu, que pour n'encourir le blasme de la rupture de la paix, quoy que l'Empereur luy en donnaist assez de sujet, il luy offrit mesmes par son ambassadeur, de l'ayder & assister contre le Duc de Buillon: encor qu'il fust son allié, & en ceste qualité compris audit traicté de Noyon: & que par le traicté particulier faict à Romorantin en 1520. il luy fust loisible de faire la guerre ou bon luy sembleroit, excepté seulement contre les Ducs de Lorraine & de Gueldre, amis & alliez de la France, neantmoins il luy fit retirer son armée & la licentier. Et l'Empereur le voyant desarmé, & ainsi abandonné par le Roy, le fit attaquer par le Comte de Nassau, qui luy prit la pluspart de ses places, le Roy luy ayant refusé tout secours & assistance: & sans la trefue que le Prince de Cimay, de qui il auoit espousé la sœur, luy procura vers l'Empereur, il eust encouru vne ruine entière.

Voila au vray l'histoire de ceste guerre, par le droit de laquelle l'Empereur ayant conquis le chasteau de Buillon, il le donna à l'Eglise de Liege, & depuis par les traictés de Madrid & de Cambray fust conuenu, *Que le Roy François ne fauoriseroit ny donneroit ayde & assistance directement ny indirectement au Duc de Buillon ny à ses enfans, en cas qu'ils voulussent entreprendre quelque chose sur le chasteau &*

Duché de Buillon : lesquelz traictez ne font aucune mention des debtes dont est question, n'estant vray semblable que l'Empereur les ait données, parce qu'il n'estoit en son pouuoir de le faire. Car il y a grande difference entre ce qui est pris par guerre, & tombé par ce moyen sous la main & puissance du vainqueur, lequel en peut disposer, *iure belli*, & ce qui demeure en la possession du vaincu.

Ce fut autresfois la dispute des Thebains contre les Theffaliens, Alexandre le grand ayant conquis & ruiné la ville de Thebes, trouua es archives vne obligation de cent talens, qui auoient esté prestez par les Thebains aux Theffaliens, ausquelz il en fit don à cause qu'ils l'auoient assisté en ceste guerre. Depuis les Thebains s'estans releuez de leur ruine, & reestablis par Cassander, ils redemanderent aux Theffaliens les cent talens que leurs predecesseurs leur auoient presté auant la guerre, lesquels se preualurent du don qu'Alexandre leur en auoit fait, comme de chose qui luy appartenoit par le droit de la guerre, & en furent deschargez par iugement des Amphyctions, Iuges communs de la Grece, *Nec enim dubium est*, comme dit Quintilian sur ce sujet, *quin iure belli omnia Thebanorum bona in dominium venerint Alexandri, & hic potuerit creditum illud exigere, atque Theffalis ab eo datum, ac si pecuniam dedissent.* Quintil. lib. 5.
cap. 10.

Mais il n'en est pas de mesmes au fait dont il s'agit: car l'Empereur en la guerre qu'il fit au Duc de Buillon, ne le ruina pas absolument, ainsi qu'Alexandre fit les Thebains, il luy prit seulement quelques places: mais il luy en resta assez pour ayder puis apres à reprendre la pluspart de ce qu'il auoit occupé. Et les obligations dont on demande auourd'huy le payement, ne tomberent pas en la puissance de l'Empereur, ainsi que la promesse des Theffaliens en celle d'Alexandre, ains furent conseruées par le Duc de Buillon, & ont tousiours depuis demeuré en sa possession & de ses successeurs, ou ayans cause d'eux iusques à present. De sorte qu'il semble ri-

dicule, de dire que durant ceste guerre, l'Empereur aie donné & remis aux defendeurs ce qu'il n'auoit point: puis que les obligations estoient demeurées es mains de leurs creanciers, qui auoient, comme encor à present, droit de les demander, & pouuoir de les faire executer, & par ce moyen ceste pretenduë donation, quand elle auroit esté faite, seroit vaine & superflüë.

Voyons maintenant si en la guerre qui se fit incontinent apres entre l'Empereur & le Roy François I. laquelle fut suiue du traicté de Madril en 1526. Et en la seconde qui recomença l'an suiuant, & fut suiue du traicté de Cambray en 1529. & en la derniere commencée en 1537. suiue du traicté de Crespy en 1544. il y a plus d'apparence que ces debtes ayent peü estre données & remises à cause que le Duc de Buillon, à qui elles appartenoint, estoit allié de la France, & en toutes ces guerres tenoit le party du Roy; & ceux qui les deuoient, estoient alliez de l'Empereur, & tenoient son party.

Il n'y a point de doute que si ces debtes eussent esté deuës au Duc de Buillon par des sujets de l'Empereur, demeurans en ses pays patrimoniaux & hereditaires, il eust peü les confisquer par le droit de la guerre, comme appartenäs à son ennemy, & les donner à qui bon luy eust semblé, ou les remettre à ceux qui les deuoient. Mais les debiteurs estans subjects de l'Euesque & Prince de Liege, il n'a peü, quoy qu'il fust son allié, vser en son pays du droit de confiscation: l'alliance & confederation qu'ils auoient ensemble ne luy donnant aucune iurisdiction ny pouuoir en son territoire: *Nec enim fœderibus transfertur iurisdiction, nec confœderatus in confœderati territorio, confiscare potest.* Et s'il y auoit eu lieu de confisquer, cela n'appartenoit qu'à l'Euesque, lequel sans contredit, est de toute ancienneté seigneur spirituel & temporel, iouissant en son pays de tous droits Regaliens, & de souueraineté sans recognoistre aucun superieur. Et en ceste qualité les Euesques de Liege & leur pays ont de tout temps fait diuers traictes d'alliance, de trefue & de paix avec les

Euesque de
Liege, Prince
souuerain.

autres Princes, & selon la necessité de leurs affaires, se font quelquesfois mis en la protection, tantost des Roys de France, tantost des Ducs de Bourgogne, ainsi que leur histoire en faict foy, & se peut voir par diuers traictés faicts en diuers temps, tant avec la maison de France que celle d'Austriche. Thibaut de Bar Euesque de Liege, par traicté de confederation de l'an 1304. promit de seruir le Roy Philippes le Bel, contre tous, fors le Roy d'Allemagne. Adolphe de la Mark son successeur, par autre traicté de l'an 1337. promit de secourir le Roy Philippes de Valois, Edoüard 3. Roy d'Angleterre, & Louis de Bauieres. Et l'an 1461. le pays de Liege se mit en la protection du Roy Louis XI. entre lequel & le Marquis de Bade Gouverneur & Regent dudit pays, & la Cité de Liege, se fit vn traicté l'an 1465. par lequel ils promettent de s'ayder mutuellement à l'encontre du Duc de Bourgogne, de Louis de Bourbon leur Euesque, & le Comte de Charolois, & leurs adherans. Et l'an 1485. Iean de Horne Euesque de Liege se mit en la protection de Maximilian & Philippes aussi Ducs d'Austriche. Et l'an 1518. Erard de la Mark son successeur, & ledit pays de Liege firent vn traicté d'alliance defensue avec Charles d'Austriche Roy d'Espagne, depuis renouuellé l'an 1557. avec Philippes II. son fils, par Georges d'Austriche.

Et encor que l'Euesque de Liege soit Prince de l'Empire, & le pays de Liege vn des membres d'iceluy, dependant du Cercle de Westphalie, cela pourtant ne l'oblige à autre chose, sinon aux contributions, & à la manutention de la paix publique de l'Empire: ainsi que les autres Princes d'Allemagne, qui iouissent de pareils droicts de souueraineté. Et l'Empereur, par ceste consideration, n'a peu pretendre aucun pouuoir de confiscation au pays de Liege, parce que la guerre ne se faisoit à l'Empire, ains à luy seul, & pour querelles particulieres, en ses pays patrimoniaux & hereditaires, estans hors l'Empire, & ne dependans d'iceluy. Et l'alliance & con-

*Alliance de-
fensiue entre
le Roy d'Espa-
gne, & l'Euef-
que & pays de
Liege.*

federation que l'Euesque & les Estats du pays de Liege auoient avec luy par les traictez de l'an 1518. auant qu'il fust paruenue à l'Empire, n'estoit qu'à cause des Prouinces du pays bas, lesquelles y sont expressement designées, à sçauoir Lothier, Brabant, Limbourg, Falkembourg, Hainaut, Namur, Arlem, Luxembourg & autres d'outre Meuse, proches & voisines dudit pays de Liege. Et au traicté de Cambray de l'an 1529. l'Euesque & pays de Liege y sont compris & son pays, entre les alliés de l'Empereur, à cause desdits pays bas. Et ceste alliance, n'estant que deffensiue il n'estoit obligé d'estre amy de ses amis, & ennemy de ses ennemis: ny de leur faire la guerre, ainsi qu'en l'offensiue: ains seulement de s'assister reciproquement en la conseruation de leurs pays.

Par là se recognoist que les defendeurs ne se peuuent preualoir du traicté de Cambray, moins encor de celuy de Crespy, lesquels ne se peuuent estendre à ce qui concerne le Duc de Buillon, ains se doiuent entendre des dons faicts par l'Empereur, ou par les Roys, auant le traicté de Madril, & durant la derniere guerre qui commença l'an 1537. à leurs alliez & tenans leur party, non seulement des biens des subiects, de l'un ou de l'autre, qui se trouuoient es lieux & endroicts de leur subiection & iurisdiction: mais aussi des biens que les alliez pouuoient auoir esdits pays, (auquel cas il leur estoit loisible de les confisquer comme appartenans à leurs ennemis & adherans: & les donner, ou à leurs subiects, ou à leurs alliez, tenans leur party) mais non pas des biens que les alliés auoient, & qui leur pouuoient estre deubs par les alliés mesmes, ou par les subiects de l'un ou de l'autre, en leurs propres pays, esquels n'ayans point de guerre ensemble, quoy qu'ils fussent de party contraire, pour les querelles d'autrui: ils n'estoient point neantmoins tenus pour ennemis, n'ayant point de guerre ouuerte & declarée entre eux. Et ceste interpretation des susdicts traictés se confirme par celuy de Chasteau en Cambresis de l'an 1559. lequel porte expressement, *Qu'on ne pourra rien deman-*
der

der des debtes qui auront esté confisquées durant la derniere guerre recommencée en 1551. par les Princes, en la iurisdiction de laquelle elles auront esté données.

De sorte que la question se réduit à ce point, de sçavoir si l'Euesque de Liege, en son pays, a de faict confisqué ce qui estoit deub par ses subjects au Duc de Buillon, & si de droict il l'a peu faire.

Or les defendeurs ne sçauoient faire apparoir d'aucunes lettres dudit Euesque, non plus que de l'Empereur, par lesquelles il leur ait donné & remis lesdites debtes à droict de confiscation. Et il n'y a pas d'apparence qu'il l'ait faict: car il n'auoit aucun droict ny pretexte legitime de le faire, puis qu'en toutes les guerres de l'Empereur & du Roy François, il ne s'est faict, ny de la part du Roy, ny du Duc de Buillon & son pays, ny de la part de l'Euesque & pays de Liege, aucun acte d'hostilité entr'eux. Et ne se trouuera point qu'alors on ait, ny en France, ny à Sedan, confisqué aucuns biens appartenans aux Liegeois; ny aussi au pays de Liege, aucuns biens appartenans aux François; ou aux subjects du Duc de Buillon.

L'Euesque de Liege n'a confisqué, ny peu confisquer les debtes du pays de Liege.

Erard de la Mark lors Euesque de Liege, qui fut esleu l'an 1506. & mourut l'année 1538. en laquelle se fit le traité de la trefue generale de Nice, & Robert II. Duc de Buillon, & Prince de Sedan, estoient freres; Et encores qu'ils fussent de diuers party & d'alliance & confederation contraire, & que mesmes il n'y eust guerres d'affection ny bonne volonté entr'eux, pour les causes que nous auons representées cy dessus: le Duc de Buillon n'estant sans ressentiment de ce que ledit Euesque possedoit son chasteau de Buillon, qu'il s'estoit faict donner par l'Empereur, & se reseruant d'en tirer raison, quand il en trouueroit l'occasion opportune, ainsi qu'il fit l'an 1552. Neantmoins ils n'en vindrent iamais iusques là, de se faire la guerre entr'eux, en leurs pays, pour les querelles qui ne se démesloient lors qu'entre l'Empereur & le Roy François I. ainsi qu'il

se peut voir par l'histoire, & par diuerfes lettres dudit Euesque & ses successeurs, & des Magistrats & Conseil de la Cité de Liege, des années 1527. 1528. 1532. 1550. & 1551. par lesquelles se verifie que iusques là ils ont reconnu ces debtes; tant s'en faut qu'elles eussent esté confisquées durant les guerres susdites, ny qui leuren ait esté fait aucun don ny remise, auant ny depuis le traicté de Madrid.

*Guerre du Roy
Henry II. au
pays bas & de
Liege.*

Il est vray que l'an 1554. en la guerre que le Roy Henry II. fit à l'Empereur Charles V. dans les pays bas, il se fit quelques actes d'hostilité dans le pays de Liege, à cause qu'on y refusa le passage à son armée, & y furent prises quelques places qui auoient receu garnison d'Espagnols & Allemands, entr'autres la ville & chasteau de Dinan. Et l'histoire des Euesques de Liege remarque, que Georges d'Autriche, qui estoit lors Euesque de Liege, successeur d'Erard de la Mark, ayant alliance defensiue avec l'Empereur, à cause desdits Pays bas: par aduis de son Chapitre & du Magistrat de la Cité de Liege, confisqua les biens que le Roy de France, ses subiects, ou ses alliés & confederéz, pouuoient auoir au pays de Liege: voicy les termes, *Is etiam diebus, cepit Rex Francie, & ipsius fœderati, in patrie Leodienfis fines excurrere, prædamque agere. Quamobrem præsul Casareæ Maiestati fœdere iunctus, maturo cum Capitulo suo, Ciuitatisque Magistratu habito consilio, omnia bonas villas, Dominia, possessiones, terras, decimas, quæ Rex ipse Gallie, eiusve confœderati, haberent & possiderent in agro Leodienfi iure belli, vti commissæ publicauit.* Mais il ne se trouuera point qu'il ait confisqué les debtes, ausquelles son pays estoit obligé vers le Duc de Buillon, qui estoit lors Robert III. lequel ne luy faisoit point la guerre, estant des l'an 1553. dans Hedin, qu'il defendoit contre l'Empereur & y fut fait prisonnier de guerre, & mené à l'Ecluse, où il demeura tant que la guerre dura: & ne fut mis en liberté que l'an 1556. en vertu de la trefue faite à Vaucelles le 5. Feburier 1555. apres auoir payé soixante mil escus d'or de rançon, & retournant en Fran-

*Gesta Pontific. Leod. in
vita Georg.
Austriaci cap.
3. tom 3.*

ce il mourut à Guise, premiere ville de la frontiere de Picardie, sur la fin de l'année 1556. ayant laissé Henry-Robert Duc de Buillon son fils encor mineur, en la tutelle de la Duchesse de Buillon sa mere. D'ailleurs telles confiscations n'ont accoustumé de se faire, ny s'exécuter que sur les subiects: les Princes souverains (tels que sont l'Euesque de Liege & le Duc de Buillon) ne confisquent point, ce qu'ils doibuent les vns aux autres: ceste exception semble perpetuelle à leur égard: *sunt diis inter se commercia*. Parce qu'ils maintiennent leurs droicts & prétentions par les armes, & par les traités de paix se font restituer ce qui a esté pris & occupé sur eux. Et posé que cela eust esté, les traitéz de Chasteau en Cambresis & de Veruins cy-dessus rapportez, y ont pourueu expressement, par lesquels a esté conuenu que pour terminer les differends qu'auoit le Duc de Buillon, tant avec l'Euesque qu'avec les Communautés du pays de Liege, on nommeroit des arbitres de part & d'autre: Par ce moyen, l'action du Duc de Buillon, touchant ces debtes, luy a esté conseruée, aussi bien que pour le Chasteau de Buillon: sans que les guerres qui ont esté depuis 1521. iusques en 1559. & la derniere depuis 1595. iusques en 1598. y aient apporté aucun preiudice. L'histoire mesmes des Euesques de Liege, en la vie de Robert de Bergues, remarque, qu'en execution du traité de Chasteau en Cambresis, les Estats du pays de Liege furent assemblez, pour proceder à la nomination des arbitres: & resolu par iceux, de prier le Duc de Buillon de nommer le premier, parce qu'il estoit demandeur. Voicy les termes: *Cum nuper Rex Philippus articulum pacis Cameracensis Leodiensem patriam concernentem misisset, Prasul Maij 22. in publico ordinum conuentu, illum legi curauit, & iuxta hunc articulum, actum in eo conuentu de arbitris, ex parte Principis & Capituli nominandis, & documentis ac auctoritatis literis in eam perquirendis: deliberatione super his habita, visum fuit rogare Dominum Sedanum, ut quandoquidem personam actoris in hac causa sustineat, ipse arbitros primo nominaret.* Ce qui tesmoigne

Confiscation de debtes, durant la guerre, ne s'estendit qu'aux subiects. & non aux Princes.

Gesta Pontific. Leod. cap. 3. tom. 3.

bien clairement, qu'il n'y auoit eu aucune confiscation ny remise de ces debtes.

*Les debtes du
pays de Liege
n'ont peu estre
prescrites.*

Reste donc à examiner la prescription, par le moyen de laquelle les Communautés du pays de Liege pretendent auoir acquis la descharge de ces debtes : quand bien, par le droit de la guerre, ils ne l'auroient peu obtenir, à tiltre de confiscation. En quoy ils se trouueront aussi mal fondez. Car le temps des troubles, & des minoritez deduit, (ainsi qu'il a esté representé cy dessus, contre la pretendue prescription de l'Euesque & Chapitre de Liege touchant le Duché de Buillon) depuis l'an 1521. iusques en 1604. & 1605. que feu monsieur le Duc de Buillon premier Mareschal de France, ayant acquis les droicts de la maison de Sedan, interrompit ceste prescription par la demande nouuelle qu'il en fit, depuis continuée en 1631. par monsieur le Duc de Buillon son fils, tant à l'Euesque qu'aux Estats & Communautés du pays de Liege, il ne se trouuera point de temps suffisant pour fonder vne prescription complete & legitime.

D'ailleurs la recognoissance que les defendeurs ont souuent faicte de ces debtes tant auant les guerres & durant icelles, que depuis, sur la demande qui leur en a esté faicte, estans mesmes entrez en compte & payement de partie : ayans sur ce donné des assignations, & stipulé les interests des sommes qui estoient deuës : sans iamais auoir opposé aucune confiscation, ny descharge, les rend du tout non receuables à pretendre aujourd'huy aucune prescription. *Per debiti agnitionem vel solutionem partem, vel faenoris, vel per nouam debiti cautionem, interrumpitur prescriptio, tam in personali actione quam in hypothecaria.* C'est ce qui est decide par l'Empereur Iustin en la loy *Cum notissimi*. §. 5. Cod. de prescript. 30. vel 40. annor. *Si quis debitorum ad agnoscendum suum debitum, secundam cautionem in creditorem exposuerit : tempora memoratarum prescriptionum interrupta esse videbuntur, quantum ad priorem cautionem pertinet, quæ scilicet in nouata permansit, tam in personalibus*

quàm in hypothecariis actionibus. Il y a mesmes aucunes des obligations dont il s'agit, lesquelles deuoient estre acquittées dans certaines années, & partie des sommes promises par icelles, payable par chacun an, auquel cas durant lesdites années la prescription n'a peu courir, suiuant la disposition de ladite loy *Notissimi. §. 6. In his obligationibus quæ dationem per singulos annos, vel menses, aut aliquod singulare tempus continent, tempora memoratarum prescriptionum non ab exordio talis obligationis, sed ab initio cuiusque anni, vel mensis, vel singularis temporis computari manifestum est, nulla scilicet danda licentia ei, dicendi ex transacto tempore dominium sibi in iisdem rebus questum esse.*

Et encor que les obligations dont on demande l'exécution, soient des années 1483. 1484. 1485. 1490. & 1493. neantmoins la prescription n'a peu produire aucun effect pour en pretendre la descharge par le temps, parce qu'outre les empeschemens de la guerre & des minoritez, elle a esté suffisamment interrompuë, par la demande que les creanciers en ont faicte de temps en temps, tant par lettres à l'Euesque & aux Estats du pays, qu'aux Magistrats & Mambours ou defenseurs de la Cité de Liege: que par deputez, offres d'arbitrages, mesmes par interpellations & sommations à eux faictes, en presence de notaires & tesmoins: ce que l'Empereur Iustinian en la loy 2. *Cod. de annal. except.* declare estre suffisant pour interrompre toute prescription: *Si, debitore in magna potestate constituto, creditor ad loci Episcopum, vel defensorem ciuitatis, queremoniam deduxerit, & voluntatem in scriptis manifestauerit, vel publicè proposuerit, cum tabulariorum vel trium testium subscriptione.* Ce qui doit encor plus auoir lieu entre les Princes & Estats souuerains, à l'égard desquels, les lettres & actes susdits ont autant de force, pour interrompre la prescription, que les sommation & procedures qui se font en iustice entre les particuliers. Et ceste interruption se verifie par diuers actes authentiques, mesmes par les propres lettres des debiteurs, des années 1499. 1518. 1520. 1521. 1527. 1528. 1532. 1548. 1550. 1551. 1559.

*Interruption
de la prescrip-
tion.*

1564. 1566. 1571. 1573. 1598. 1605. & 1631. Ce qui fait voir la mauuaise foy des defendeurs, & que la possession & descharge qu'ils pretendent, n'est ny iuste, ny fortifiée par le temps, qui par fois iustifie les possessions iniustes, & les constituë en demeure & mauuaise foy : & partant sont aussi obligez aux intersts, depuis la demande qui leur a esté faite.

Par ces moyens est clairement iustificié le droit de Monseigneur le Duc de Buillon : & qu'il est bien fondé en sa demande, tant contre l'Euesque & Chapitre, que contre le pays & Communautés de Liege.

F I N.



